

EUSKAL ESKOLA PUBLIKOAZ HARRO TOPAGUNEAREN HELBURUAK



Euskal Eskola Publikoarekiko harrotasuna adierazi eta euskal hezkuntza-sistema osorako eskola bakarra aldarrikatu nahi dugu, herri bezala publikoaren, eskubide kolektiboen eta gure ume guztientzat aukera-berdintasunaren alde eginez.

Hau da oztopo guztien gainetik lortzen ari garen euskal eskola publikoa: denontzat eraikia, denona eta guztiontzat, zerbitzu publiko doakoa eta unibertsala eskaintzen duena. Tinko sinesten dugu hezkuntza publikoaren balioan, hezkuntza inklusiboa, euskalduna eta laikoa, aniztasunean eta hezkidetzan konprometitua, berdintasunean eta kalitatean oinarritutakoa, ikasle guztien hezkuntza integrala eta gizarte-kohesioa bermatzen dituen.

Horretarako, 4 helburu hauek lortzeko lan egingo dugu:

- 1.- Euskal Eskola **Publikoa balioan jarri** eta euskal gizarteak berarekiko duen atxikimendua handitu. Euskal eskola publikoa **hezkuntza sistemaren ardatzean jarri**, bere alde borrokatuz eta bere printzipioak lau haizeetara zabalduz.
- 2.- Eskola Publikoak behar dituen baliabideak exijitu eta tokian tokiko dituen **oztopo eta diskriminazioak salatu**: baliabide falta, langileen behin-behinekotasuna zein gainerako lan baldintzen okertzea, hezkuntza euskalduna bermatzeko eredua, segregazioa errazten duten bideak, ikasleen onarpen prozesu bidegabea epe barruko zein epez-kanpoko matrikulazioetan, 0-3 etapan gertatzen ari den pribatizazioa, kontzertazio unibertsala eta kontrolik gabekoa, itunpeko ikastetxeen mesederako eskola publikoan gelen ixtea ahalbideratzen duten mekanismoak...
- 3.- Hezkuntza **sistemaren pribatizazioaren aurka** egitea. Gaur egungo sistema duala eta sistema horren atzean dauden kontzertuak salatu. Pribatizazio dinamika eteteko Eusko Jaurlaritzak **ikastetxeen publifikazioa** ahalbideratuko lukeen araudia sortzea aldarrikatu.
- 4.- Hezkuntza **legearen inguruko hausnarketa eta eztabaida zabaldu** ikuspuntu jantzi eta kritiko batetik aurre egin ahal izateko.

Helburu hauek muga izanik, Euskal Herriak nahi eta behar duen Eskola Publikoa eraikitzen jarraituko dugu, egindako ibilbide oparoan sakonduz, egunero eskola publiko hobe eraikiz herri hobe eraikitzen dugulako. Egin dugun bidez harro, administrazioen oztopoen aurrean tinko eta aurrera begira ilusioz lan egingo dugu.